Traccia 1: "I nosti veci ne conta,, ovvero "I nostri nonni ci raccontano"

Mia nona Lucila la ga 70 e pasa anni, ge piazi criticar sempre el mio modo de far le robe, el mio sempre "faremo" e dopo che la ga visto che son sempre che sbisigo per sto telefonin la ga deciso de contarme come che iera nei tempi sui... "Nei dintorni de Levade verso Portole ze tanti vilaggi, che oggi ze quasi tutti abbandonadi. Una volta qua viveva tanta gente che lavorava i campi, le vide, i olivi. Cresceva tutta la qualità di frutti, tante qualità de fighi, ma più de tutto ge ne iera de uva. La stagion delle vendemie iera la più bella dell'anno: uva bianca e nera piu parte malvasia, teran, refosco e muscato. Quasi ogni vilaggio el gaveva el torcio per far l'oio. In autunno se ingrumava i olivi, la gente la cantava sulle piante, contenti per la bona raccolta.

Tutto quel che cresceva sui campi ge voleva portar casa e le strade le iera brute e tutte in monte. Uno dei piu grandi meriti per l'aiuto dell' omo iera el mus, sia per l'uva, per i olivi e i legni, e anche per tutto quel che ghe occorreva. Più de tutto, questo animal se doperava per menar a casa l'acqua netta de bever. L' acqua dei sorgenti iera per imbeverar i animai, lavar la roba, bagnar i orti e tutto il resto. Le case, i balidori, le scole, tutto de piera in casa iera e el fogoler iera per scaldarse e cusinar. Sul fogo iera pien de fiori. Sora la testa i rapi de uva. Tutti i vilaggi pieni de gioventù. Andar dei nonni pareva andar in paradiso. Giente bona e le nonne che con poco le saveva far boni magnari e tutto iera naturale ingrumado in campagna. El formento e el formenton se menava in mulin col mus. Se metteva in sacco e se lasava che i mazina. Quando che iera pronti se andava denovo col mus menar casa. lera tre mulini in bosco sul fiume. Anche in veci tempi la gente andava in ricerca de tartufi. Le nonne ingrumava e sugava figi e le faceva pan de figo: piccoli rotondi panetti come specialità de quei tempi. I vilaggi dove passavo per andar in campagna portar el pranzo con la burica a mio papà ze Mavretici, Bazijaki, Zubini, Šalici, Mikolotici, Brusti e Facini. Ancora oggi go vivo el ricordo del torcio de Zubini dove portaimo i olivi per far el oio. Anca la iera de grande aiuto el mus. El tirava tutto torno la roda de piera che mazinava i olivi. Per questo lavor i doveva meterghe sui oci una benda nera che nol vedi, perche' nol gavesi podu andar tanto tempo in stesso verso. Questa bestia bona e ubbidiente iera de grande aiuto ai contadini per tutto dove no podeva andar i manzi col carro. Oggi sun tutti questi monti no ze piu' neanche uno, le case svode e piu' parte crollade. In un vilaggio ze due famiglie, e nell'altro solo una persona. I nonni de parte paterna e della mamma iera de Basiachi, Salici, Micolotici e Fachini. Ogni giorno guardo verso su perche' me iera tanto bel andar dei mii nonni. Son nata e vivo a Levade e con grande piacer lasso questo racconto a ti mio sin e a tutti i giovini che non i ga mai vivù in questo mondo. E se qualchedun ti disi che ti son un mus, sii contento, perchè el iera la nostra mano destra.

Brava mia nonna Lučila Vlahović nata Zanko, son proprio fiero de gaverla fatta contenta con questo racconto... Viva el mus ! Viva i nostri nonni!

Loris Flego, 2.C

Gospodarska škola- Istituto professionale Buie

Školski brijeg 1, 52 460 Buje

Insegnante di riferimento: Katarina Badurina

Pseudonimo: Floris